

Hubungan dua hala kian erat

KUALA LUMPUR, Rabu — Perasaan syakwasangka dan tidak mempercayai antara satu sama lain yang menyulitkan hubungan antara Malaysia dan Singapura pada masa lalu kini semakin luput, kata Menteri Luar Datuk Abu Hassan Omar hari ini.

"Hubungan dua hala antara kedua-dua negara jiran itu kini bertambah baik sejak beberapa tahun kebelakangan ini.

Datuk Abu Hassan menyifatkan hubungan itu sebagai 'berkembang' dan akan kekal disebabkan persamaan sejarah, politik, strategi dan kebudayaan antara kedua-dua negara.

"Kestabilan politik, keselamatan dan pembangunan ekonomi di kedua-dua negara ialah untuk kepentingan bersama dan akan memberi sumbangan kepada ke arah kerjasama yang lebih baik," katanya di jamuan tengah hari Kelab Rotary di Singapura.

Teks ucapan Datuk Abu Hassan mengenai 'Hubungan Malaysia-Singapura: Ke Arah Keharmonian dan Persefahaman' dikeluarkan oleh Wisma Putra di sini.

Datuk Abu Hassan, yang menekankan kepentingan saling bergantung, berkata kedua-dua buah negara tidak mampu berasa 'seگان antara satu dengan lain. "Kita mesti lebih mengenali satu sama lain dan mahu berbuat demikian".

Katanya, ada ruang cukup untuk mewujudkan harmoni dan kesefahaman yang lebih baik dan matlamat ini sama dijunjung oleh kepimpinan kedua-ke dua negara.

Adalah perlu 'rangkalan murid tua' yang sedia wujud di Malaysia dan Singapura dibaharui dan

diperluaskan dengan pertukaran secara beransur-ansur pemimpin di kedua-dua belah Tambak Johor itu, katanya.

Kesefahaman yang lebih baik hasil daripada interaksi yang sentiasa berlaku akan menjadi penstabil utama dan segala perbezaan akan menjadi lebih mudah diselesaikan, tambah beliau.

Datuk Abu Hassan berkata perkongsian berkehendakkan kepercayaan dan keyakinan bersama, yang memerlukan masa dan kesabaran. Tambahnya, sungguhpun Malaysia dan Singapura mendekati masalah yang sama dengan cara berlainan, ini tidak bererti kedua-dua negara itu cuba merosakkan antara satu sama lain.

Latihan bersama

Katanya, apa jua perkara sementara yang menyakitkan hati, ciri-ciri persahabatan yang lebih tahan akhirnya akan mengatasi segala-galanya.

Mengenai komitmen kerjasama, Datuk Abu Hassan berkata ini diberi tekanan oleh kepimpinan kedua-dua negara dan memuncak di upacara menandatangani satu memorandum kesefahaman oleh kedua-dua Perdana Menteri Jun lalu.

Persetujuan untuk mengadakan latihan bersama ketenteraan baru-baru ini dan bantuan Singapura dalam mendapatkan Malaysia sebuah kerusi yang tidak tetap di Majlis Keselamatan Bangsa-Bangsa Bersatu berupa bukti kepada kerjasama ini, tambah beliau. — Bernama